

МЕСЯЦА АВГУСТА В 4-Й ДЕНЬ.

Святых семи отроков, иже во Ефесе

НА ВЕЧЕРНИ

На Господи, воззвах: стихиры, глас 1.

Подобен: Небесных чинов:

Седмоязычный свещник, * озаривший седмочестных отрок, * приидите, присно воспоем память, вопиюще Христу, * тыя венчавшему: * молитвами их, Господи Избавителю, * живот наш умири.

Иже по естеству умершии паче естества воистинну, * якоже от сна, абие восташа, * вкупе семь отроцы Божественнии. * Чудо ужасное: * триста бо лет и семьдесят и два, * якоже мертвии, в пещере спаша.

Со Иамвлихом Божественным и Максимилианом * Мартиниана и Иоанна, * Антония же вкупе с Дионисием почтим ныне, * яко молящихся о нас, * восхваляюще с сими * и мудраго благочестно Ексакустодиана.

Ины стихиры Богородицы, подобны:

Препрославленна еси в роды родов, * Дево Мати Отроковице, Богородице Марие, * мира Предстательнице, * рождающая плотию Сына Безначального Отца, * соприносущна же Духу воистинну, * Егоже моли спасти нас.

Одержими прегрешеньми ненадежными, Чистая, * Ты Предстательницу едину имущу, Дево, * вопием благодарно: * очисти ны, Пресвятая Богоневесто, * Ты бо еси миру прибежище * и заступление роду нашему.

Согрешений пучиною обуреваемъ, * в тихое пристанище * чистыя молитвы Твоя, Богородительнице, прибег, * взываю Ти: спаси мя, * державную Твою простерши десницу, * рабу Твоему, Пренепорочная.

Слава, и ныне:

Жезлом Твоя молитвы, * Богородительнице Чистая, * звериные страсти окаянныя души моя отжени вскоре, * мирно жизнь мою управляющи, * и святому мя стаду избранных Твоих овец причти.

Крестобогородичен:

У Креста предстоящи Сына и Бога Твоего * и долготерпение Того смотряющи, * глаголаше, плачущи, Мати Чистая: * увы Мне, Чадо сладчайшее, * что сия страждеша несправедно, Слово Божий, * да спасеши человечество?

Тропарь, глас 4: Мученицы Твои, Господи:

Или сей, глас тойже:

Велия веры чудесе, * в пещере, яко в чертозе царском, * святии семь отроцы пребыша, * и умроша без тли, * и по мнозех временех восташа, яко от сна, * во уверение воскресения всех человеков. * Тех молитвами, Христе Боже, помилуй нас.

Ин тропарь, глас 8:

Благочестия проповедники и Воскресения умерших изобразители, * Церкви столпы седмочисленные, * отроки всеблаженные песньми восхвалим: * тии бо по многих летех нетления, аки от сна воставше, * всем возвестиша яве мертвых востание.

НА УТРЕНИ

Оба канона Октоиха, святых канон на 4, глас 2.

Песнь 1

Ирмос: Грядите, людие, * поим песнь Христу Богу, * раздельшему море и наставльшему люди, * яже изведе из работы египетския, * яко прославися.

Числом сияющия честныя дети семь, приидите, верно почтим, яко просвещают Христову Церковь, светильники седмосветлая, лучшия законных.

Иже в плотское первее умерщвление, живи суще, Христово отроцы семь одеяшася, якоже сон, смерть преславно приемше, утверждающе учение воскресения.

Иерихон падеся гласом труб семи, прелести же возношение седмогласием ныне веры страдалец сниде до ада и разорися.

Богородичен: Новолепно рождество обновляеши, Безневестная, ибо Отцу Собезначальное и Божественному Духу соприисносущное Слово из Тебе воплотися, спряжения не оставль.

Песнь 3

Ирмос: Утверди нас в Тебе, Господи, * Древом умерщвлей грех, * и страх Твой всади * в сердца нас, поющих Тя.

Звезды неуклонны семь, явистеся, верою сияюще, страсготерпцы, и иже лести, ныряющия глубиною, к пристанищу спасительному управисте.

Пред судищем твердо ставше, святии, мучителей, якоже иногда Маккавей, воинства изменистеся тленныя жизни, ввоинившеся Христу.

Достойно Богу приятна явистеся жертва молитвы, святии отроцы, и вонею благоуханною смрад обличивше прелести твердо.

Богородичен: Купина в Синаи проображаше Твое, Дево, преславное рождество: огнем бо Божества не опалилася еси, в ложесна приемши верно.

Ин кондак, глас 4:

Прославивый на земли святыя Твоя * прежде втораго и страшнаго пришествия Твоего, Христе, * преславным востанием отроков * показал еси Воскресение неведящим е, * нетленна одеяния и телеса явив, * и царя уверил еси вопити: * воистинну есть мертвых востание.

Седален, глас 4.

Подобен: Скоро предвари:

Яко столпи суще Церкви Христовы, * стены развергосте неверия твердо, седмобратнии мученицы. * Темже прежде смерти еллинский гнев, * и паки по смерти еретическую бурю отгнавше, и воскресения веру удержавше, * молитесь верою утвердитися нам.

Слава, и ныне, Богородичен:

Дево Всенепорочная, Яже Пресущнаго Бога рождающая, * со Безплотными Того непрестанно моли * оставление прегрешений и исправление жития дати нам прежде конца, * верою и любовию поющим Тя по долгу, едина Всепетая.

Крестобогородичен:

На Кресте Тя възвышена яко узре Пречистая Мати Твоя, Слове Божий, * матерски рыдаючи, вещаше: * что новое и странное сие чудо, Сыне Мой? * Како, Жизнь всех, вкушаеши смерти, * оживити мертвыя хотя, яко Милосерд?

Песнь 4

Ирмос: Услышах, Господи, * славное Твое смотрение * и прославих, Человеколюбче, * непостижимую Твою силу.

Священное совокупление и числом яве почтеное, седмицу честных отроков воспоем.

Умудрена суетием нечестиваго прелести царя Ефесстии отроцы показаша безумна.

Жертвы пренепорочныя яко воистинну и заколениа Господня верою явистеся, отроцы святии.

Богородичен: Не презри, молящи о нас, присно Благословенная, избавитися всякия скорби, Чистая.

Песнь 5

Ирмос: Света Подателю и веков Творче, Господи, * во свете Твоих повелений настави нас: * разве бо Тебе, иного бога не знаем.

Нечувственно первее, общею умерше на земли смертию, паче естества воскреснусте абие, уверяюще яве, Ефесстии отроцы, мертвых воскресение.

Освящшеся Богови исповеданием истинныя веры, яко страдальцы законнии Господни, избавлени бысте, мудрии, темниц и ран и венцы приясте.

Победивше твердо идольскую лесь, славнии мученицы, и от нечестивых ересей учения, сохраняйте присно исповедающия мертвых воскресение.

Богородичен: Во двух естествах и Ипостаси единой бысть, совершен сый Человек неслиянно и совершен Бог, рождейся от Святыя Матере Пресуцный.

Песнь 6

Ирмос: В бездне греховней валяеся, * неизследную милосердия Твоего призываю бездну: * от тли, Боже, мя возведи.

Божественныя премудрости равночисленнии столпи, да восхвалятся святии отроцы семь, словесы, яко камением, сокрушше мучителей безбожное повеление.

Законом Божественнаго промысления соблюдаеми, готовое приясте погребение пещеру, в нейже мертви и нетленни, многолетни, святии, явистеся.

Нетления востасте свидетели, веру отгоняюще тлетворную и мертвую и Богу молящеся о надеющихся воскресения.

Богородичен: Ныне естество женское возрадовася, ныне печаль преста, радость же процвете, яко Мария роди радость, Спаса Христа Бога.

Кондак, глас 4.

Подобен: Вознесыйся:

Мира сущая тленная презревше * и нетленныя дары приемше, * умерше, кроме тления пребыша. * Темже востают по многих летех, * все погребше лютых неверие, * яже во хвалении днесь, вернии, восхваляюще, Христа воспоем.

Песнь 7

Ирмос: Телу златому премудрыя дети не послужиша, * и в пламень сами поидоша, * и боги их обругаша, * среди пламене возопиша, и ороси я Ангел: * услышася уже уст ваших молитва.

Приятелища Божия чиста и избрана отроцы явишася: имиже предания ересей от Церкви отгонятся и православие сияет, яко есть воскресение всякой души же и плоти, якоже родися.

Яко суще тверди, прежде смерти воистинну во страдании своем святии отроцы абие явишася и по умертвии живи, славою содержими Божественною, благочестно уверивше собою истинное воскресение.

Душам вкупе и телесем чувственным будет воскресение, якоже бо не мощно без тела души в мир приити, сице ни телеси без души,— прехвальнии глаголаху,— или прославится душа, или посрамится.

Богородичен: Рождающая Бога Спаса всех, Марие, отчаянных еси исправление, грешных обновление, и ненадежных надежда, и поющих помощь: благословен Бог отец наших.

Песнь 8

Ирмос: В пещи отрочестей прообразил еси иногда Твою Матерь, Господи, * образ же Сия из огня изымаше, неопально входящая, * Юже поем, являющуюся Тобою концем днесь, * и превозносим во вся веки.

Корень горести нечестивых, возрастший люте, Божественнии отроцы, посекаше прелести ереси, приношают плод веры, живы, и погребшася верно, и воскресше.

Ефесских начальников, отроцы святии семь и страсотерпцы, Христове Церкви и царству верному, Божественное явистесь утверждение, Егоже превозносим во вся веки.

Тверди явльшася на земли и равночисленнии показавшася звездам, нелестное шествие Божественныя веры отроцы творяще, зываху: Тя превозносим, Христе, во веки.

Богородичен: Никтоже погибе, Чистая, веры надежду имея на Тя, православно, Мати Божия, токмо завистию отметающися Твоего не поклонятися зрака воображению.

Песнь 9

Ирмос: Яже прежде солнца светильника Бога возсиявшаго, * плотски к нам пришедшаго, из боку Девичу, * неизреченно воплотившая, Благословенная, Всечистая, * Тя, Богородице, величаем.

Богатство чудес и Божественных таин откровение святых явися ныне воскресение: иже бо иногда естественною плотию умерше смертию, нетленно ныне воскресоша, одеяни, якоже не умерше.

Знания сокровище и веры твердое ограждение святых детей явися пещера, провозвещающая будущее всех воскресение: не четверодневнаго Лазаря, но вечныя воскресити мертвецы.

Венцем мучения, пострадавшие, законно одеястесь, отроцы семь, столпы премудрости Божия, и учением православия востание яviste, яко Церкви поборницы и молитвенницы воспевающих вас.

Богородичен: Тело и душу Твою нескверно Богу соблюла еси, Чистая, Царь же возжела Твоя доброты, Христос, и Матерь Своего воплощения показа, Марие преславная, спасение мне присно подавая.

Светилен.

Подобен: Жены, услышите:

Оружием Честнаго Твоего Креста вооружшесь, страстотерпцы Твои, Слове, * сопротивныя силы твердо победиша * и с Тобою, Христе мой, всех Царю, царствуют вкупе.

Богородичен:

Воистинну Богородицу, Тя исповедуем, Владычице, Тебе ради спасшиися, * ибо Бога неизреченно родила еси, разоршаго Крестом смерть, * к Себе же привлекша соборы, * с нимиже Тя восхваляем.

На стиховне Октоиха.

Слава, и ныне, Богородичен.

Молитва

О пречуднии святии семичисленнии отроцы, Ефеса града похвало и всея вселенныя упование! Возрите с высоты Небесныя славы на ны, любовию память вашу чтущия, наипаче же на младенцы христианския, вашему заступлению от родителей своих препорученныя. Низведите на ня благословение Христа Бога, рекшаго: оставите детей приходити ко Мне. Болящия убо от них исцелите, скорбящия утешите, сердца их в чистоте соблюдайте, кротостию исполните я и в земли сердец их зерно исповедания Божия насадите и укрепите, во еже от силы в силу им возрастати. И всех нас, святей иконе вашей предстоящих, мощи же ваша с верою лобызающих и тепле вам молящихся, сподобите Царствие Небесное улучшить и немолчными гласы радования тамо прославляти великолепое Имя Пресвятыя Троицы, Отца и Сына и Святаго Духа, во веки веков. Аминь.